



Aningaasalersorneqarsimasunik aallakaatitassianik nutaarsiassanik, maannarpiarlu soqutigintunik imallit tusagassiuutit aallakaatitsisinnaangornissaat anguniarlugu inatsimmut atuuttumut allannguutissatut siunnersuuteqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Aallakaatitassianik nutaarsiassanik, maannarpiarlu soqutigintunik imallit aningaasalersorneqarsimanerat, aningaasaliinermut tunngaviusimasoq suungaluarpalluunniit, aallakaatitsinnginnermi tunisisup kinaassusaanik takutitsisumik nalunaarutigineqartarnissaa piunasaqaataassaaq.

(Demokraatit Inatsisartuni gruppiat)

(Siullermeerneqarnera)

Demokraatit Inatsisartuni ilaasortaataitaannit siunnersuummut qujanaq.

Demokraatinut pingaartuuvoq tusagassiuutit kiffaanngissuseqarnerisa illersorneqarnissaat. Tusagassiuutit demokratiskimik inuunitsinnut pingaaruteqartorujussuupput, kiffaanngissuseqarnerallu apeqqusersorneqassanani.

Siunnersuumi uani pineqarpoq, siunissami aningaasatigut tapiiffigineqartunik nutaarsiassaqaartitsiviit-maannakkorpiarlu pisunik aallakaatitsisarnissaat periarfissaqarnersut. Qularutissaanngilaq, oqallinneq una pingaaruteqarmat. Qangaaniilli imaassimavoq, tusagassiorfiit niuernerpalaartut pilerisaarutinit ussassaarutinillu aningaasalersorneqartarsimmamata. Kialluunniimmi upperinngitsoornaviannngilaq tusagassiuutit CNN-itut, TV2 News allarpassuillu ussassaarutinit aningaasalersorneqartut. Tassani qitiuvoq, aningaasaliisoq imaluunniit ussassaarisoq qaqugukkulluunniit ilanngussat imaannut ilanngutequsaannginnerat.

Isertuussassaannngilaq, uani siunnersuummi KNR pineqarmat, ullumikkut malittarisassat malillugit aningaasalersorneqartunik nutaarsiassanik maannakkorpiarlu pisunik aallakaatitseqqusaanngimmat. Taassuma malittarisassap KNR-ip kiffaanngissuseqarluni aammalu upperineqarluni ingerlatsinissaanik qulakkeerisuuvoq. KNR-illi uppernassusaanut ajussaqlinerluni, nutaarsiassaq imaluunniit maannakkorpiaq pisumik aallakaatitassiaq aningaasaliiffigineqarpat? Qinigassarmi alla unaassamat, aallakaatitap sananeqanngitsoornissaa taamaalillunilu aallakaatinneqanngitsoorluni. Taamaaliornerup kialluunniit ilisimasaqarnerulissanngimmagu.

Demokraatit isumaqarput, eqqortumik nalunaarusiornikkut periarfissaqalersinnaassasoq KNR-ip aningaasalersorneqartunik nutaarsiassanik- aamma maannakkorpiaq pisunik aallakaatitsisinnaanissaa. Soorlu assersuutigalugu akisuunik tusagassiorartorluni angalanerit assigisaaluunniit pineqartillugit.



Maluginiarsimavarput, Naalackersuisut allannguutissatut siunnersuuteqarsimasut, soqutigisaqaqatigiit attuumassutillit peqatigalugit nalilersuinissamik aammalu pitsaaqutininik ajoqutaanillu sulisitsiniartoq inatsisitigut aammaassinissaq anguniarlugu, tassani malittarisassat atuuttut malillugit, tusagassiorfiit aningaasalersorneqartunik nutaarsiassanik- aamma maannakkorpiaq pisunik aallakaatitsisinnaanerannut. Demokraatit isumaqarput, allannguutissatut siunnersuutit ataatsimiititaliap sulinissamini eqqarsaatigalugillu oqaluuserissagai.

Siunnersuut taakkuninga oqaaseqaateqarluta Kultureqarnermut, Ilinniartitaanermut Ilageeqarnermullu ataatsimiititaliamut suliareqqitassanngorlugu ingerlateqqipparput.